

外交失敗之原因及今後國民之覺悟

梁啓超

一

嗚呼。和會席上。我國竟一敗塗地矣。天下事往往集衆因而始成一果。此次失敗。屬於外因者。其一則日本事前布置之周密與臨時因應之機敏也。其二則英法之不我助也。其三則美總統之受牽掣也。屬於內因者。其一則我政府之屢次加繩自縛也。其二則參戰之假公濟私有名無實也。其三則駐歐外交官之向不得力漫無布置也。其四則政府對於此次和會絕無方針也。其五則專使手腕拙劣且日事內訌失時廢事也。其六則國民批判力薄弱後援無力也。嗚呼。今大事則既去矣。國民得此噩報。其疾首扼腕灰心短氣不知何若。雖然。前事不忘。後事之師。吾故臆舉其致敗之由俾我國民知所懲愆焉。漢昭烈有言。事會之來。豈有底極。苟能慎之於後者。則此未足爲病也。

二

吾以此次日本之成功與我之失敗對照。而益信天下事之萬無倖倖也。而益歎人之所以謀我者其處心積慮眼光四射前後策應如此其可畏也。日本之窺我山東。已非一日。無端而歐戰發生。予以絕大機會。遂急起直追。以軍事占領的狀態謀承襲德人侵略之遺產。雖然。此狀態極不穩固。彼蓋知之。於是汲汲焉求爲法律的保障。當一九一五年聯軍大挫於東戰場。彼乃乘友邦之危。突然提出二十一款之要求。以

最後通牒迫我承諾。於是中德間權利義務之關係。變爲中日間權利義務之關係。其所得保障一矣。猶懼其未足。當一九一七年二月德國潛艇戰略極猖獗時。彼乃要挾英法意俄四國與訂密約。要求在和會席上關於山東權利予以援助。其與英所訂密約。在其年二月十二日。實美德絕交後之第三日也。法俄意之約。亦以兩旬內相繼成立。其所得保障二矣。猶懼其未足。於其年四月間與美國互換文書。要求美承認其在東亞優越地位。其所得保障三矣（此保障力較薄弱）。猶懼其未足。去年德軍垂敗之際。餌誘我國與結處分膠濟路及延長高徐順濟。兩路之約。於是舉德人已得將得之遺產悉數由政府認彼爲有正當承襲之權利。其所得保障四矣。由此觀之。日人關於山東問題。其事前布置。注意周密而首尾一貫也如此。

巴黎和會既開。彼一面提出山東問題。一面鋪陳其戰績。示英法以德色而關其口。其遭我國之反駁也。不動聲色。一面提出人種平等問題向美索價以資之。一面以全力聯絡英法。挾密約以劫持。抵死不放。及至最緊要關頭。彼則揚言將不署名國際同盟以恫喝美總統。一面表示所提人種問題可以撤回。夫人種問題之不能通過。彼寧不知。然必提出者。將以此爲山東問題之交換條件也故目的既達。得魚忘筌。其手腕之峭緊敏捷又如此。

三

我則何如。嗚呼。吾不忍言。吾又不忍不言。當二十一款之初提出也。國人切齒扼腕。民氣達於沸度。當時鄙人亦曾著論十數篇。力主無論如何萬勿簽字。寧可任日人以武力占領。不容以條約承認其權利（見民國四年三四月間之英文京報及大中華雜誌）。果能如此。即今日在和會上之理直氣壯宜何如者。然茲事太

遠。且不復論。設僅至此而止。猶得曰此最後通牒之結果。吾不能承也。夫此次和會席上我所持爲唯一之武器者。豈不以此耶。乃不料有去年九月二十四日之約。而此唯一之武器。乃不復能自完。嗚呼。去年九月二十四日何時哉。興登堡線則既破矣。距休戰前僅四十日耳。德軍敗亡。瞭若觀火。和會之開。指日可待。我於彼時。何憂何慮。乃忽舉數年來懸而未決之大問題全國人所延頸企踵以待訟直於世界者。一夕而斷送之。問其何所求。則區區二十萬日金供十月初一以後新政府之行政費也。當時外間微有所聞。政府則絕對否認。都中報館坐登此消息而封禁者蓋八家矣。吾輩忠厚待人。以爲政府雖喪心病狂。當不至此。不料乃果爲事實也。尤可駭者。此祕約之祕。非惟祕我國民也。且祕及列席和會之全權。顧使事後爲余言（五月四日）謂我之提出抗議在正月二十七日。二十七晚得京電始知密約內容。當時以告美遠東局長韋廉士。韋氏頓足痛恨。謂大事已去八九也。當余之初至巴黎也。日人正揚言於報紙。謂山東事已完全由中日兩國接洽妥愜。吾方力闢其不然。嗚呼。誰知吾所說者乃純爲門外人語耶。嗚呼。以二千萬日金之故而斷送山東斷送中國。誰謂爲之。孰令致之。我國民而不糾問此責任。吾其復能以國家之資格立於大地耶。

當問題之既決定也。英外相巴爾福招我全權而告以崖略。謂日本當戰爭中其盡力於協約國者甚多。吾不能拒其請。嗚呼。使我宣戰後即爲出兵之準備。能以去春有大軍在西歐戰場者。則今日論功。我亦何遑居人後。我在和會上之發言權不能有力。則參戰之假公濟私有名無實。實尸其咎也。

四

事前種種取敗之道既若是矣。苟臨事因應得當猶可冀補救萬一。而我復何如。吾瀕行時。曾詢總統及政府當局以外交方針。屢詢而屢不得要領。初以爲彼蓋向我祕密。既乃知其本無方針也。關於山東問題。吾陳述對待之法。彼等不置一辭。當時大以爲怪。由今思之。乃知其早與日人私訂約束。而吾儕猶在夢中也。和議初開。英美方面之爲我謀者。方盛倡統一鐵路外債之議。其是否別有旁意。且勿深論。至其直接動機。則確在破除勢力範圍以防制日本。或彼輩早已知日本之與英法俄意訂有密約。料我山東交涉難得良果。故爲我畫最後補救之策。亦未可知。要之不失爲一有價值之外交方略。吾敢斷言也。我政府及全權若有眼光有手腕者。一面在和會總會上提出山東問題全部堂堂正正之主張。同時在該會交通委員會中提出統一鐵路外債之議。英美必極力爲我後援。失於彼者或且得於此。但得山東鐵路不爲一國所獨占。則危險之程度。亦可減殺幾許。乃此議既爲國中一部分人所不便。遂與東報相結託。作檉鼓應。一致反對。而京滬間之輿論。亦復不加注意。貿然和之。政府則舉棋不定。苟日間兩電專使。辭旨矛盾。此議遂消滅於羣言淆亂之中。於是我所提出於和會者。除對德照例要求之瑣碎條件外。僅唯一之山東問題。一擊不中。全軍俱覆。以視日本之多方烘托操縱自如者。其巧拙之相去爲何如哉。

巴黎專使團。其不滿人意處固不少。以吾平心論之。失敗之責任。政府居十之七八。而專使僅一二耳。據外間所傳言。專使屢以細故爭意氣。正事因之開置。此固中國人一種劣根性。深可浩歎。然吾以爲專使之失策。乃在單提一事。以致更無交換補救之餘地。使當時能在交通委員會中提出處分鐵路辦法。則山東路權。或得較有利益之解決。亦未可知。又對於英法方面。平時既無布置。臨時更少聯絡。

以致並相當之同情亦不能得。又事前太高興以爲成功可操左券。於對手方面之進行。與夫第三者之態度。未嘗敬慎。調查形勢變遷。漫無覺察。一旦失敗。如聞迅雷。欲稍挽救。無從著手。此則專使不能不分其咎者也。

五

我此次唯一之後援。則美國耳。自美總統宣說十四條。天下想望風采。各國之含冤積憤者。皆欲赴勦焉。我國之敢毅然提出此問題以與強鄰抗者未始不恃此。然威氏於山東問題之性質。本已不甚了了。吾於三月二十四日與彼晤談。對於此問題尙幾費解釋也。雖然。威氏固不得謂爲無意助我。其所以爲德不卒者。實以受種種牽掣。卒至以己身利害關係故。爲日本所劫持。威氏之初至歐也。抱絕大理想而來。其唯一目的之國際同盟。即所以求此理想之實現。及其抵歐。而歐洲之褊狹的國家主義。方瀾漫於空氣中。與彼理想格格不入。威氏之健羽。已鍛十之七八矣。其國內反對國際同盟之氣焰抑甚烈。威氏受內外之夾擊。萬一國際同盟之議不就。彼將無復面目以見其父老。威氏所處地位。其弱點實在是。當四月初旬。正各國相持極劇時。威氏以去就爭。嘗電招其坐船來歐示將決絕。而此例一開。即有尤而效之者。意大利因芬謨問題。其首相外相聯翩歸去。威氏正大窘。日本旋即仿其故智以相恫喝。謂不遂所欲。彼決不署名於國際同盟。此實能使威氏驚心動魄之言也。英法既已因訂有密約故。受人牽鼻。其較自由之美國。亦復以別問題爲人挾持短長。於是焚焚無告之中國遂被犧牲矣。雖然威氏誤矣。山東問題與芬謨問題比較。其輕重相懸何啻霄壤。其與美國利害關係之疏密更何啻霄壤。威氏以全力爲南斯拉夫

爭芬謨。而山東問題竟屈於日本。恐自此美國人吁食之日方長耳。

六

今事已至此。怨艾前失。亦復何補。惟我國民所宜堅持及覺醒者有數事焉。

其一當知山東與南滿既同在一國勢力之下。京師腹背受敵。全國南北中斷。國決無以自存。故今茲之憂患。深入腹心。絕非前此手足癱瘓之比。國民宜以最大決心。挽此危局。雖出絕大之犧牲亦所不辭。須知等是亡也。與其亡於十年之後。不如及今圖之而猶可冀萬一之不忘。鄭子產有言。國不競亦陵。何國之爲。弱國所以能自存於世界。全恃其有一瞋不視之犧牲精神。使塞爾維亞比利時而稍瞻顧者。惟有吞聲飲泣待德奧之夷彼爲郡縣耳。彼之毅然反抗也。全國爲墟。於茲四年。而今何如者。是故當知。國無所謂存亡。自甘於亡。斯真亡耳。苟其不甘。則百年前已亡之波蘭。何嘗不可再造於百年後。況我之廣土衆民。又絕非塞比波之比耶。敵而謀我者。占領可也。以條約承認其權利不可也。我力不敵。寧可聽敵人占領我全國。不能以條約承認尺寸土地。爲其所有權。國民若具此決心。乃可與語此次失敗之補救。乃可以求立國於今日之天下。而不然者。坐待爲虜而已。

其二。當糾問此次失敗之責任。何故當去年德軍垂敗之時。忽與日本訂此密約。其動機安在。主持者何人。何故先事臨事與重要之歐洲友邦一無接洽。乃至前此彼所與人訂定之密約。一無覺察。今茲彼所持之態度。一無應付。駐使及專使。所爲何事。應負何咎。若不明責任所歸。將何以謝天下。總之外交界而常以此種老朽之舊式官僚與巧猾之新式官僚充斥其間。行將全國斷送而我國民猶在夢中也。吾國

民而對於此新舊式之兩種官僚未如之何。吾國其永沈九淵矣。嗚呼。

其三。當知國際間有強權無公理之原則。雖今日尙依然適用。所謂正義人道不過強者之一種口頭禪。弱國而欲託庇於正義人道之下。萬無是處。抑西人有恆言。天助自助者。苟不自助。天且不能助之。而況於人。須知我國民今日所處之境遇。前有怨賊。後無奧援。出死入生。惟持我邁往之氣與貞壯之志。當此籲天不應呼地不聞之際。蒼茫四顧。一軍皆墨。忽然覺環境之種種幻象。一無足依賴。所可依賴者。惟我自身耳。則前途一線之光明。即於是乎在也。

（錄自飲冰室合集）